

Gálatas

Pablo Galacia majarãre Jesu yarãre gojabeopu

¹⁻² Yũhu Pablo mũa Galacia majarãre ipũre gojabeogu iiaa. Yũhu Goãmu yare buhedore Jesucristo ãgu apidi ãhraa. Masa ne yũre buhedore apibirima. Jesucristopu ãgu Pagu Goãmu mera yũre apimi. Goãmu ãhrimi Jesucristo sãridire masudigu. Eropigu yũhu yu mera majarã mera Jesucristo yarã mera mũare õadorea. ³ Goãmu mari Pagu mari Opu Jesucristo mera mũare õadorea. ãgu mũare itamuri mera õaro árĩque mũa. ⁴ Jesucristo, ãgu Pagu Goãmu gamediro dopa ta iigu, ãgu basi mari ñeri iira dipuwaja sãribasadigu árĩmi. Eropiidi árĩmi i mũmu majarã ñero árĩricũre mari iibiriboro dopa. ⁵ ãgu eropiicũ iha mari Goãmure “Mũhu õagu õaro iiaa,” mũuri nũcu arĩro gahmea. Eropa ta iirã.

Jesucristo masare ãgu tauburi yujuñe ta buheriñe ãhraa, arĩ werepu Pablo

⁶ Mũa mata Goãmu yare duhurã iica. Goãmu mũare ãgu yarã árĩmorãre aĩdigu árĩmi Jesucristo ãgu marire sãribasara mera. ãgu mũare eropa aĩquerecũ mũapu ãgure duhu gajirã ya buherire peenugarã iica. “Gaji ãhraa marire tauburi buheri,” erã arĩ werecũ peerã iica mũa gajirãre. Mũa eropiira querere peegu pee uca wahaa yũhu. ⁷ Õpa waro iica mũa árĩrore. Gajirã mũa pohro eja mũare were

goroweorã iicoma. “Jesucristo marire taumi,” arĩ buherire gohrotodiarã, “Gaji ãhraa marire tauburi buheri,” arĩ buherã iicoma mware. Eropigũ mware ire werediaca. Gaji buheri marire tauburi buheri marica. ⁸ “Gaji buheri ãhraa mari tauburi buheri,” mware arĩ were goroweorãre Goãmũ buringã dipuwaja moagũ peamegue wadoreporo. Yũ basi ta were goroweocũre Goãmũ yũ sãre dipuwaja moaporo. Anyũ umaro majagũ igũ eropa buhecũ igũ sãre dipuwaja moaporo. ⁹ Gũa gajisubu arĩrare dipaturu yũhũ werea daja mware. Yujugũ mware õari buherire gajiropa buhecũ, gũa mware buhediro dopa werebigure igũre Goãmũ buringã dipuwaja moaporo. Peamegue wadoreporo.

¹⁰ Yũhũ masare buhegũ Goãmũ gamero dopa ta diaye majare buhea. Masa peesũacũ, peesũabiricũ sãre buhea. Eropigũ dohpaguere yũhũ masa peediari dihtare wereniguibea. Cristo gamero dopa ta buhediacã. Igũ pohro majagũ õagũ arĩdiagũ eropa buhea yũhũ.

Pablo igũ Jesucristo yare buhebure apirare werepũ

¹¹ Õpa weregũra mware: Yũhũ mware õari buheri eropa arĩ buhera masa ya pepiri arĩbeaa. ¹² Ne yujugũ masũ iri buherire yũre weredorebirimi. Ne yujugũ masũ yũre buhebirimi iri buherire. Jesucristo igũ basi yũre irire masicũ iimi.

¹³ Iribojegue yũ arĩricũrare yũhũ judio masa buherire peenũrũrasubu yũ iirare mũa peetuhabũ. Yũhũ Jesucristo yarãre buringã ãhaturigũ

nurusiamuribũ erãre ñero iibu. Eropigu Jesu yarãre burigã ñero iigu erãre wejẽ-pehocãdiaribũ. ¹⁴ Eropigu gũa judio masa ya buherire yũ mera masanirã tauro umu-peomuricaribũ. Gũa ñecũ sũmarã árĩricurire burigã iimuricaribũ. ¹⁵ Yũ eropa iirisubu õpa wabũ yũre. Goãmũ ãgũ õaro mahiri mera yũre sihumi pare. Ñgũ yũ dehyoaboro coregue beyetuhapũ yũre. ¹⁶ Eropigu ãgũ magũre Jesucristore yũre masicũ iimi. Ñgũre masicũ iigu yũre judio masa árĩbirãre buhebure apimi. “Jesucristo marire taumi,” arĩ buherire werebure apimi yũre. Eropa Goãmũ yũre masicũ iira pũhrũ gajirãre serẽpigũ wabiribũ. ¹⁷ Jerusaléngue árĩrãre yũ core Jesu ãgũ apinirã sãre serẽpigũ wabiribũ. Eroro eropa wabigu Arabia yebaguepũre diaye wabũ. Pũhrũguere Damascogue dujaa wabũ.

¹⁸ Uhre bojori pũhrũ Jerusaléngue wabũ. Pedrore ãagũ wabũ. Pe semana ta árĩbũ ãgũ mera. ¹⁹ Gajirã Jesu ãgũ apinirãre ne ãabiribũ irisubure. Mari Opũ Jesucristo pagũ magũ Santiago dihtare ãabũ. ²⁰ Yũhũ mũare eropa arĩgũ diaye weregũ iiaa. Yũ õpa arĩrĩre Goãmũ masimi. Eropa arĩgũ õpa arĩdiaca mũare. Jesucristo dihta yũre masicũ iimi ãgũ buherire.

²¹ Jerusaléngue árĩra pũhrũ Siria yebague Cilicia yebague ejabũ. ²² Irisubu Judea yeba majarã Jesucristo yarãpũ yũre ãha masibirima dohpa. ²³ Yũhũ Jesucristo yagũ árĩri querere peenirã árĩma. “Ñgũ Pablo marire Jesu yarãre ñero iidianũrũ curidigu dohpaguere Jesucristo

yare buhegu ãhrimi. Mari Jesucristore umupeorire dedeodiadigu dohpaguere irire Jesucristore umupeoburire buhegu wahami,” gajirã erãre eropa arĩ werecũ peenirã árĩma Judea yeba majarã. ²⁴ Eropã peerã Goãmũ mera mucubiriñorã.

2

Gajirã Jesucristo ïgu apinirã gameñorã Pablo buherire

¹ Catorce bojori pũhrũ Jerusalenguere wabũ daja. Bernabé wami yũ mera. Tito sãre aĩgãbũ. Goãmũ yũre wadoremi Jerusalengue. Eropigu erogue wabũ. ² Eropigu erore eja Jesure umupeorã gamenererogue yũhũ erã oparãre boje sihuu werebũ erãre. Judio masa árĩbirãre Jesucristo marire tauburi buherire yũ buherare werebũ oparãre. Eropã weregu erã yũ buherire õaro masicũ erãre “Õapũrica,” arĩcũ iidiabũ erãre. Erã yũ buherire gamebirã yũ buheri sãre “Waja mariri ãhraa,” arĩbocoma, arĩ pepirabũ yũhũ. Erã gamema. ³ Eropirã erã Titore ïgu judio masũ árĩbiriqerogũ ïgu Jesure umupeogũ árĩcũ ïha erã judio masa dorero dopa iidorebirima ïgũre. Eropirã ïgũre gasiro merogã wiri aĩdorebirima ïgũre. ⁴ Gajirãpũ Jesure umupeorã gamenererogue ñajajanirãpũ ïgũre circuncisión gasiro merogã wiri aĩcũ gamerima. Erã Jesure umupeorã gohra árĩbirima. Erã gũa sihubiriqerocũ gũa pohrogue peedurirã ñajajanirã árĩma. Gũare weresãdiama. “Erã Jesu yarã Moise dorerire iibirã ãhrima,” arĩdiama gũare.

“Goãmũ pohro wadiarã gua dorerire iiro gahmea marire,” arĩ dorediarima daja. Gua Jesucristo yarãpũre Jesucristo tautuhajami gua Goãmũ mera õaro árĩborore. ⁵ Eropirã erã eropa guare dorecũ ãarã erãre ne yũhribiribũ. Erãre yũhrirã iri Jesucristo marire tauburi buherire queoro buhemasibiriboaya mũare. Eropirã erã dorediarire cãhmotacãbũ.

⁶ Eropirã Jesu yarã oparã yũ buherire erãre weretuhajara pũhrũ “Mũ buheri õhaa,” arĩrã, yũ buherire yũre gohrotodiabirima. Gua judio masa dorerire iiburi sãre buhedorebirima. Erere erã oparãre masa umupeoquerecũ erã iiro dopa iibiribũ. Goãmũ árĩpehrerãre oparã árĩrã sãre bu árĩrã sãre yujuropa ta ãhami. “Erãre beyediro dopa ta yũ sãre Goãmũ beyemi,” arĩ pepibũ. ⁷ Eropirã oparã yũ buherire gohrotodiabirã judio masare árĩbirãre yũ buhe curirare peema. Eropirã yũhũ Jesucristo ãgu yare buhebure apidigu árĩcũ ãha masima yũre. Eropirã õpa arĩma yũre: “Ãgu Goãmũ judio masare iri õari buherire buhebure ãgu Pedrorre apidiro dopa ta mũ sãre apiñumi. Judio masa árĩbirãpũre iri buherire buhebure mũre apiñumi,” arĩma yũre. ⁸ Eropigu ãgu Goãmũ Pedrorre judio masare buhebure obeodigu ta yũ sãre obeomi judio masa árĩbirãre buhebure.

⁹ Eropirã erã oparã mũrerã Santiago, Pedro, Ñũ mera yũre ãha masima. Goãmũ ãgu mahiri mera ãgu yũre beyedigu yũ árĩcũ masima. Eropirã yũre Bernabé sãre õaro bocatĩrima. “Eropa ta iirã mari. Mari yujuro mera buherã. Mũapũ judio masa árĩbirã pohrogue buherã warãca.

Gupɔ judio masare buherã warãca,” arĩma yure Bernabé sãre. ¹⁰ “Iri dihta iiro gahmea,” arĩma guare. “Mojomorocurãre itamuniguicãro gahmea,” arĩma. “Eropa ta iiaa,” arĩbɔ guã erãre. Eropigɔ eropa ta yɔ buhe curirogue Jesu yarã mera niyerure gameneo erã mojomorocurãre ohaa dohpa.

Antioquíague Pablo Pedrore werepɔ igɔ òaro iibirare

¹¹ Ero pɔhrɔ guã Antioquía macague árĩcũ Pedro curigɔ erami guã árĩrore Jesure umupeorã gamenererogue. Eroque erara pɔhrɔ Pedro queoro iibiricũ ìha igɔ eropa iira dipuwaja burigã werebɔ igure Jesure umupeorã peeuro. ¹² Eropigɔ Pedro Antioquíague ne eragɔ gamenere bamurimi judio masa árĩbirã Jesure umupeorã mera. Irisubu gajirã judio masa Santiago obeonirã erama. Erã eranirã òpa arĩ pepirã árĩma. “Árĩpehrerã Jesure umupeorã judio masa árĩbirã sã guã dorerire iiro gahmea Goãmu erãre òaro ìaborore. Eropirã árĩpehrerã judio masa iiro dopa gasiro merogã wiri aĩro gahmea. Eropa árĩbirã mera babiricãro gahmea,” arĩrã árĩma eranirãpɔ. Eropigɔ Pedro erã eracũ ìha judio masa árĩbirãre dɔca wami. Erã gasiro merogã wirisũbirinirã árĩcũ erãre dɔca wami erã eranirã weresãrire güigɔ. Erã mera babirimi pare. ¹³ Igɔ eropiicũ ìha ero majarã gajirã judio masa erã sã dɔca wama judio masa árĩbirãre. Bernabé sã erã iiri queoro árĩbiricũ masiqueregɔ erãre ìhacũ igɔ sã dɔca wami erãre. ¹⁴ Erã eropiicũ ìha gamebirigohracãbɔ yɔhɔ.

Erã judio masa árĩbirãre dũca warã “Jesu dihta marire taumi,” arĩ ãhmubirima. “Moise doreri sãre umupeoro gahmea,” arĩ ãhmurima erã judio masa árĩbirãre. Eropigũ yũhũ árĩpehrerã Jesure umupeorã peeuro burigã arĩbũ Pedrore. “Mũhũ judio masũ árĩqueregũ õguere ne eragũ judio masa árĩbirã mera yujuro mera bagũ gũa judio masa árĩricũrire guñabirabũ. ¿Duhpigũ mũhũ dohpaguere gohrotodiari? ¿Eropigũ duhpigũ dohpaguere erã judio masa árĩbirãpũre gũa árĩricũrire iidorediari?” arĩ werebũ ãgũre ãgũ queoro iibirira waja.

Árĩpehrerã Jesure umupeocũ Goãmũ taumi erãre, arĩ werepũ Pablo

¹⁵ Gũa judio masa porã ãhraa. Eropa árĩrã gajirã Moise dorerire tarinũgarã iiro dopa árĩbeaa. ¹⁶ Eropa árĩbiriquererã gũa Jesure umupeorã dohpaguere õpa masirã ãhraa. Yujugũ Moise dorerire iicũ Goãmũ pohro waburi árĩbeaa. ãgũ Jesucristore umupeonijagũ ãgũ ñeri iira dipuwajare cãdijisũdigũ wahami. Iri mera dihta õhami Goãmũ mera. Eropirã gũa judio masa árĩquererã Goãmũ mera õaro árĩmorã Jesucristore umupeobũ. Goãmũ mera õaro árĩmorã Moise dorerire iibiribũ. ãgũ mera õaro árĩmorã gũa dorerire umupeorã Goãmũ mera õaro árĩbiriboaya. Eropirã Jesucristore umupeobũ gũa ñeri iira dipuwaja pehrebro dopa.

¹⁷ Eropirã gũa Jesucristore umupeori mera gũa Goãmũ mera õaro árĩrãca. Eropa Jesucristore umupeorã Moise dorerire iibiriquererã

Goãmũ dorerire tarinũgarã iibeaa. Jesucristo sã Goãmũ dorerire tarinũgadoregũ ne árĩbeami. ¹⁸ Eropigũ masare õpa arĩ buhea yũhũ. Goãmũ mũare “Õarã ãhrima,” ãgũ arĩ ãaboro dopa Jesucristopũre umupeoro gahmea. Eropigũ “Mũa Goãmũ mera õaro árĩdiarã Moise doreri sãre umupeoro gahmea,” arĩbeaa. Yũhũ Moise dorerire doregũ Goãmũ dorerire tarinũgagũ árĩboya. ¹⁹ Ero corere Moise dorerire iimũriribũ Goãmũ mera õaro árĩdiagũ. Eropã iiqueregũ dipuwajacũgũ árĩmũriribũ. Dohpaguere Jesucristo mera dipuwajacũbeaa. Eropigũ “Iri Moise dorerire iiro gahmea,” arĩbeaa pare. Eropigũ yũhũ Goãmũ ãgũ dorero dopa ta iigũ iiaa. ²⁰ Jesucristo crusague sĩrigũ yũ ñegũ árĩrare gohrotodigũ árĩmi. Eropigũ yũ ero coregue árĩdiro dopa árĩbeaa pare. Cristo yũ mera árĩgũ yũre ãgũ dorerire õaro iimasicũ iimi. Eropigũ yũ árĩricũrare iibeaa. Jesucristo yapũre iiaa. ãgũ Jesucristo yũre mahitarigũ yũre yũ ñero iira dipuwaja sĩribasadi árĩmi. Eropigũ ãgũre guñaturagũ ãgũ dorerire iiaa. ²¹ Goãmũ mera õaro árĩmorã mari ñecũ sũmarã árĩricũrire, Moise dorerire iicũ Jesucristo mari ñero iira dipuwaja sĩribasara wajamariboya. Eropigũ ne umupeogũ duhosome “Jesucristo marire taumi,” arĩ buherire.

3

*Jesucristore umupeori mera Goãmũ marire
“Õarã ãhrima,” arĩ ãhami, arĩ werepũ Pablo*

¹ Mũa pee masibirã ãhraa dohpaguere. Mũaare Jesucristo ãgu basi mari ñeri iira dipuwajare sãribasarare mũaare werecũ mũa ðaro ãha masiribũ. ¿Mũa eropa ðaro masicũ noa mũaare goroweoari dohpaguere iri diaye maja mũa umupeoborañere? ² Eropigu õpa serẽpidiaca mũaare. ¿Mũa Moise dorerire umupeori mera Espiritu Santo mũaare eranugari? Erabirimi. Mũa “Jesucristo marire taumi,” arĩ buherire peecũ Jesucristore umupeocũ ãgu Espiritu Santo mũaare erami. ãgu yarã mũa árĩmorã árĩcũ erami. ³ ¿Mũa duhpirã pee masibirã iiro dopa wahari dohpaguere? Mũa ne Jesucristore umupeorã Espiritu Santo itamuri mera ãgu yare iimuribũ. ¿Eropirã duhpirã dohpaguere mũa turari mera iidari? ⁴ ¿Mũa Jesucristo yarã árĩnugarã mũa Jesucristore umupeora waja mũa ñero tarirare guñabeari? ¿Mũa eropa umupeora “Bu gohra ãhraa,” arĩ pepiri mũa dohpaguere? ⁵ Õpa ðaro guñaro gahmea. Goãmũ mũaare ãgu Espiritu Santore odigũ árĩmi. Espiritu Santo mũa mera árĩgu mũa watope deyorõ moarire mũaare ðarire iimi. ãgu eropiigu Moise dorerire mũa umupeori mera eropa iibeami. Mũa “Jesucristo marire taumi,” arĩ buherire ðaro pee ãgure umupeocũ eropa iimi.

⁶ Gũa judio masa ñecũ Abrahãpu Goãmũre “Diaye ta árĩgu ãhrimi,” arĩ ðaro umupeoñumi. ãgu eropa umupeocũ ãha Goãmũ ãgure “Ñeri dipuwaja marigu ðagu ãhrimi,” arĩ ãañumi. ⁷ Eropirã õpa masique mũa. Goãmũ õpa arĩmi: “Árĩpehrerã masa judio masa árĩbirã

sã Abrahã umupeodiro dopa ta yũre umupeorã Abrahã pãramerã åhrima. Eropirã yahaarã åhrima,” arĩmi Goãmũ. ⁸ Iribojegue irire Goãmũ arĩ wereyutuhañumi. Īgũ werepira õpa åhraa Īgũ yare gojarapũgue: “Árĩpehrerã masa judio masa árĩbirã sã yũre umupeorãre ‘Õarã åhrima,’ arĩ ĩagũca. Ñero iira dipuwaja marirã ĩagũca erãre,” arĩñumi. Eropigũ iri õari buherire Abrahãre arĩ wereyuñumi. “Árĩpehrerã masa mũhũ yũre umupeoro dopa ta yũre umupeocũ ‘Õarã åhrima,’ arĩ ĩagũca yũhũ erãre. Erãre õaro iigũca,” arĩñumi Goãmũ Abrahãre. ⁹ Abrahã Goãmũre Īgũ umupeocũ Goãmũ õaro iĩñumi ĩgũre. Eropigũ árĩpehrerã masa mari sã ĩgũre umupeocũ Goãmũ õaro iigũcumĩ mari sãre.

¹⁰ Gajirã õpa arĩrã åhrima. “Moise dorerire õaro iicũ Goãmũ ‘Õarã åhrima,’ arĩ ĩagũcumĩ marire,” arĩrima. Eropa arĩrã dipuwajacũrã åhrima dohpa. Goãmũ yare gojarapũgue õpa arĩ werea. “Moise dorerire iirã erã iri dorerire árĩpehrerire queoro iipehobirã dipuwajacũrã åhrima,” arĩ gojara åhraa. Eropirã iri dorerire iipehomasibirira waja dipuwaja moasũmorã åhrima árĩpehrerã. ¹¹ Ne yujugũre iri dorerire iipeho masiya mara. Eropirã Moise dorerire iiri mera Goãmũ mera õamasibeama. Õpa arĩ gojañuma Goãmũ yare gojarapũgue. “Īgũre umupeorãre Goãmũ ‘Õarã åhrima,’ arĩ ĩhami. Ñero iira dipuwaja marirã ĩhami. Eropirã erã õaro árĩnigũicãrãcoma Goãmũ mera,” arĩ

gojañuma. Eropirã mari masia. Ne yujugure iri dorerire ïgu iiri mera Goãmũ ïgure “Õagu ãhrimi,” arĩ ïabeami. Goãmure umupeogu dihta õaro árïgucumi ïgu mera. ¹² Goãmure umupeogupũ, “Goãmũ yure yũ ñero iira dipuwaja maricũ iigucumi,” arĩmi. Moise dorerire iigupũ “Yũ basi iri dorerire iigũ ñero iira dipuwaja mariro õaro árïgũca,” arĩrimi. Eropigũ ïgu iri dorerire iipehomasibigũ árïgũ ñero iira dipuwajacugũ dujami.

¹³ Eropirã mari árïpehrerã iri doreri mera ñero iira dipuwajacurã dujamuriribũ. Mari eropa árïcũ ïha, Jesucristo mari ñero iira dipuwaja ïgu basi wajayemi ïgu crusague sïrigũ. Goãmũ yare gojarapũgue õpa werea: “Ïgu yucugugue dirisiudigũ Goãmũ ïgu ñero iira dipuwaja moadigũ ãhrimi,” arĩ gojañuma iri-bojegue. Eropigũ Jesucristore crusague dirisiudigure mari ñero iira dipuwajapure Goãmũ ïgure dipuwaja moadigũ árĩmi. Eropirã maripũ ñero iira dipuwaja marirã dujaa pare. ¹⁴ Jesucristo eropiicũ Goãmũ Abrahãre õaro ïadiro dopa ta judio masa árïbirã sãre õaro ïanugami. Eropigũ ïgu arĩdiro dopa ta ïgu obeodigũ Espiritu Santopũ erami marire Jesucristore umupeorãre.

Ïgu buherare werenemopũ Pablo

¹⁵ Mari masa mari iiro dopa ta weremũhtagura mũare. Perã “Õpa iirãca,” erã arĩ weretamura pũhrũ gajigũ gohrotomasibeami. ¹⁶ Eropigũ Goãmũ Abrahã mera weretamura pũhrũ Abrahãre ïgu arĩrare gohroto masiya mara.

Õpa arĩ werepiñumi ïgure: “Mu pãrami árituriagu mera áripehrerã masare õaro iigura,” arĩ wereñumi. Eropa arĩgu ïgu pãramerã árituriarãgue mera arĩgu iibiriñumi. Yujugu ta ïgu pãrami árituriagu dihtare arĩgu iinumi. Eropa arĩgu ïgu pãrami árituriagu Jesucristo ariburire arĩ wereyugu iinumi. ¹⁷ Eropigu õpa arĩ werea mũare: Iribojegue Goãmũ Abrahã mera weretamugu masare ïgu õaro iiburire wereñumi. ïgu eropa weretamura pũru yoari boje pũru cuatrocientos treinta bojori árituriagu mera áripehrerã masare õaro iigura,” arĩ wereñumi. Eropa arĩgu ïgu pãramerã árituriarãgue mera arĩgu iibiriñumi. Yujugi pũru Moiserẽ ïgu doreri apiñumi. Moise doreri árinũgaquerecũ Goãmũ Abrahãre werepira pehrecũ iibiriyoro. ¹⁸ Goãmũ Abrahãre mahigu õpa ïgure arĩ weretuhãnumi. “Áripehrerã masare mũ yũre umupeoro dopa ta yũre umupeorãre õaro iiguca,” arĩ weretuhãnumi. Eropiro Moise doreri árinũgaquerecũ Goãmũri iri dorerire iiri mera masare taubeami. Moise doreri iiri mera mari taricũ Goãmũ mũare “Waja mariro õaro iig mera arĩgu iibiriñumi. Yujuguca,” ïgu arĩrapũ duhpiburi áribiriboaya.

¹⁹ ¿Eropigu duhpiburire iri dorerire Moiserẽ apiyuri Goãmũ? Masa erã ñerire masiborore apiñumi iri dorerire erã ñero iira dipuwaja masiborore. Abrahã pãrami árituriagu Jesucristo ïgu eracũgue árituya iri doreri. Eropigu Jesucristo ïgu eracũ Goãmũ Abrahãre ïgu werediro

dopa ta masare ðaro iĩnumi. Goãmũ iri dorerire apigũ anyuare weremũhtaĩnumi. Erã anyua wereĩnuma Moisere. Ĩgũ Moisepũ masare wereĩnumi. ²⁰ Ĩgũ masare ðaro iiburire Goãmũ ĩgũ basi ta werepiĩnumi Abrahãre. Gajirã mera werebeobiriĩnumi ĩgũ iri dorerire apidiro dopa ta. Eropigũ ĩgũ Abrahãre werepirapũ Moise doreri tauro ðhaa.

Moise dorerire werepũ Pablo

²¹ Goãmũ Moisere ĩgũ dorerire apigũ, ero coregue Abrahãre ĩgũ arĩrare “Yũ arĩdiro dopa iisome pare yũhũ,” arĩgũ iibiripũ ĩgũ. Abrahãre ĩgũ arĩmũhtadiro dopa iibu iipũ. “Masare ðaro iigũca,” ĩgũ arĩrare iibu iipũ dohpa. Moise dorerire iiri mera mari Goãmũ mera ðaro árĩmasirã mari iri dorerire ðaro iirã ñero iira dipuwaja opabiriboya. ²² Eropa árĩquerecũ Goãmũ yare gojarapũgue ðpa ãhraa: “Masa árĩpehrerã erã ñero iira dipuwaja opama, arĩ gojara ãhraa. Eropa dipuwajacũrãre erã Jesucristore umupeocũ Goãmũ ðaro iigũcumi erãre. Ĩgũ Abrahãre werediro dopa ta iigũ erãre ñero iira dipuwaja marirã ĩagũcumi.

²³ Jesucristore umupeori mera masare tauburi árĩboro core gũa Moise doreri doca árĩmũribũ. Eropa Moise dorerire iirã peresugue árĩro dopa árĩmũribũ. Jesucristo gũare tauboro core eropa árĩmũribũ. ²⁴ Õpa sã árĩburi árĩbũ Moise doreri: Moise doreri mera Jesucristore mari masiburi erabũ. Mari porãre erã buherogue soro dopa ta Moise doreri marire Jesucristore masicũ iibũ. Eropirã mari Jesucristore umupeocũ ĩgũ

marire taumi. Mari ñero iira dipuwaja maricũ iimi. ²⁵ Eropirã dohpaguere mari Jesucristore umupeorãre Goãmũ “Õarã àhrima,” arĩ ìhami. Gũa Jesucristore masirã ìgũre umupeorã árĩrã dohpaguere Moise doreri doca árĩbeaa pare.

²⁶ Mũa sã árĩpehrerã Jesucristore umupeorã ìgũ yarã árĩrã Goãmũ porã àhraa. ²⁷ Eropirã mũa árĩpehrerã Jesucristore umupeorã ìgũ waĩ mera waĩyesũnirã árĩrã Jesucristo ìgũ iro dopa ta àhraa. Jesucristo Goãmũ magũ árĩro dopa ta mũa sã Goãmũ porã àhraa. ²⁸ Eropirã árĩpehrerã Jesucristo yarã yujuro mera àhraa. Yujugũ porã iro dopa àhraa. Eropigũ gũa judio masare mũa judio masa árĩbirã sãre Goãmũ yujuropa ta ìhami. Masa pohro majarãre erã oparã sãre yujuropa ta ìhami. Ùmare nome sãre yujuropa ta ìhami. ²⁹ Eropirã mũa Jesucristo yarã árĩrã Abrahã pãramerã sã àhraa. Eropigũ Goãmũ Abrahãre “Mũre òaro iigũra,” arĩrare mũa sãre iimi. Cristo yarã mũa árĩcũ ìagũ mũare òaro iigũcumì.

4

¹ Mari iri doreri doca árĩbiriborore mari Jesu yarã árĩborore weregũra daja. Yujugũ majigũ ìgũ pagũ yare wũaro opapehobu árĩqueregũ majigũ árĩgũ pohro majagũ iro dopa àhrimi. Gajirã dorero doca àhrimi dohpa. ² Gajirã ìgũ pagũ apinirã ìgũ ya árĩburire ìhadibuma dohpa. Ìgũ pagũ gameranũ árĩcũgue ìgũ basi ìgũ yare doremi pare. ³ Ìgũ majigũ gajirã dorero doca ìgũ árĩro dopa ta mari masa mari

ñecũ sũmarã árrĩcũri doreri doca árrĩmũriribũ. Pohro majarã iro dopa ta árrĩmũriribũ. ⁴ Mari eropa árrĩnirãre mari Pagũ Goãmũ ĩgũ gameranũ ejacũ ĩgũ magũre ĩgũ pohro árrĩdigũre obeodigũ árrĩmi. ĩgũre obeocũ ĩgũ nomeoguere dehyoadigũ árrĩmi. Eropo dehyoagũ judio masũ árrĩdigũ árrĩmi Moise dorerire iigũ. Eropigũ Goãmũ obeodigũ árrĩmi ĩgũ magũre. ⁵ Gũa iri doreri doca árrĩrãre taubure obeodigũ árrĩmi ĩgũ magũre. ĩgũ marire taugũ mari pohro majarã iro dopa árrĩnirãre wiugũ ĩgũ porã árrĩcũ iimi.

⁶ Eropiituhaja mũa sã ĩgũ porã árrĩcũ ĩgũ Jesucristo mera Espĩritu Santore obeomi mũare. Eropirã Espĩritu Santo marire ĩgũ itamuri mera Goãmũre mari Pagũre “Ahũ,” arãa mari pare. ⁷ Eropirã mũa Goãmũ porã ta ãhraa. ĩgũ porã árrĩrã mũa ñecũ sũmarã doreri doca, pohro majarã iro dopa árrĩbeaa pare. Goãmũ magũ Jesucristo wiunirã ãhraa. Mũa eropárrĩrã ĩgũ porã árrĩrã Goãmũ oburire oparãca mũa árrĩpehrerire.

Pablo Galacia majarã Jesu yarãre guñaricũrũ

⁸ Mũa ero core Goãmũre masibirã árrĩrã gajirã goãmarãre umupeomũriribũ. Eropirã erã pohro majarã iro dopa árrĩmũrirabũ. Goãmũ gohrare umupeobirimũriribũ. ⁹ Eropo árrĩquererã ta dohpagũre Goãmũre masia. Goãmũrũ mũare ĩha masimi. ¿ĩgũ eropa masiquerecũ ta duhpirã i yeba majarã erã pepirire gahmeri daja? ¿Duhpirã iribojegue mũa ñecũ sũmarã doreri mũa iidiro dopa ta mũraro ta Cristo mariro dopa ta iidiri daja? ¿Eropirã duhpirã dohpagũre Moise dorerire mũa iinũgarã, pohro majarã iro

dopa árĩdiari daja mũa? ¹⁰ Judio masa erã bosenuri iro dopa mũa sã iica Goãmũa mera õadiarã. Soorinuri nũcu, aberi nũcu, bosenurire eropiica. Bojori nũcu bosenurire õaro iica. Mũa eropiiri queoro árĩbeaa. ¹¹ Mũa eropiicũ pee ñero sĩporãcũca yũpũ. Mũaare yũ turaro buhequerecũ ta “Iri waja mariboca,” arĩ pepia.

¹² Eropigũ yũhũ mũaare bũrigã õpa arĩ werea. Mari Jesucristore umupeoturadiro dopa ta umupeoque daja. Yũ Jesucristore umupeogu gũa judio masa doreri yũre taubiricũ ñha irire umupeobiribũ pare. Eropirã mũa sã Jesucristore umupeorã iri dorerire umupeobiricãro gahmea Goãmũa mera õaro árĩmorã. Yũhũ mũa pohro ne árĩcũ mũa ne ñero iibiribũ yũre. ¹³ Mũa masia yũhũ mũa pohro ne árĩdirore. Yũhũ Jesucristo marire tauburire ne mũaare buhegu ejagu dorecũgu árĩbũ. ¹⁴ Yũ dorecũgu ñero taribũ. Yũ eropa dorecũgu árĩquerecũ mũa yũre doobiribũ. Yũre õaro umupeo õaro bocatĩribũ. Goãmũa obeodigu anyu árĩro dopa yũre ñabũ. Yũre Jesucristore iiro dopa õaro iibũ. ¹⁵ Yũre bũrigã gamebũ. Yũre bũrigã gamerã yũ serẽropẽ ta árĩpehrerire omorã árĩbũ yũre. ¿Mũa eropa árĩcũ dohpa wahari dohpaguere? Mũa negohraguere yũre mucubiridiro dopa ta dohpaguere mucubiribeaa. ¹⁶ ¿Mũaare diaye majare yũ werera waja mũa ñhaturigu wahari dohpaguere?

¹⁷ Mũa pohrore gaji buherire buherã mũaare õaro umupeocoma. Erã eropa umupeoquererã mũaare sĩporã mera mahibiricoma. Mũa yũre yũ buheri sãre gamebiricũ gahmema erã. Mũa

erãpũre umupeocũ gahmema. Eropirã mũare umupeocoma. ¹⁸ Masare umupeocũ õapũrica. Erã weca dihta umupeocũ õabeaa. Yũ árĩcũ dihtare umupeocũ õabeaa. Árĩpehrerãre yu-juropa ta õari mera umupeoniguicãro gahmea. ¹⁹ Mũa yũ porã iro dopa ãhraa. Eropigu mũare guñaricũa. Mũare bũrigã guña teboricũa. Yujugo porãcũbo teboricũro dopa ta yũ sã teboricũa mũare guñagũ. Igo magũ õaro dehyoacũ gamego teboricũmo. Mũa Goãmũ porã õaro árĩcũ gamegũ teboricũa yũ sã. Mũa Jesucristo árĩricũrire õaro opacũ gahmea. ²⁰ Mũa pohro bũrigã wadiarica. Yũ mũa mera árĩgũ yũ bãsi mũare õaro weremasiboya gojaripũ gojaro mariro. Eropigu mũare dohpaguere ãabigũ mũa Jesucristore õaro umupeoturanemoborore masibirica.

Agar Sara mera erã árĩrare werequeogu mari Goãmũ porã árĩrare werepũ Pablo

²¹ ¿Mũa Goãmũ mera õaro árĩmorã Moise dorerire iiniguicãdiarã mũa Moise arĩ gojarare masibeari? ²² Õpa arĩ gojañumi Moise: Abrahã porã ũama perã árĩñuma. Ígũ marapo pohro majago Agar waĩcũgo yujugũ porãcũñumo. Pũhrũ Abrahã maraporũ Sara waĩcũgo gajigũ porãcũñumo. ²³ Ígũ pohro majago magũ mari masa iro dopa ta masa dehyoañumi ígũ. Abrahã igore porã moara pũhrũ mata nijipo ãhri porãcũñumo. Ígũ maraporũ mata porã bocamasibiriñumo. Eropigu Goãmũ ígũ arĩdiro dopa ta igore porã bocacũ iĩñumi. ²⁴⁻²⁵ Erã perã nome iribojegue eropa warare õpa buhegũra

mũare. Goãmũ Abrahãre wererare iirã Sara áriro dopa ãhrima. Gajirã Moise dorerire iirã Agar iiro dopa ãhrima. Agar igo porã sã gajirã dorero doca árimũriñuma. Pohro majarã árimũriñuma. Erã áriro dopa ãhrima Moise dorerire iirãpũ. Eropirã Moise doreri doca árimũrirã ãhrima pohro majarã iro dopa árirã. Iri dorerire iirã “Goãmũ mera õaro árirãca,” arĩmũririma. Iri dorerire Goãmũ Moise apĩñumi Sinai waĩcũdigũ utãgũgue Arabia yebague. Dohpague ire dorerire Jerusalẽgue judio masa umupeoma. Eropirã ire doreri doca ãhrima. ²⁶ Õpa ãhrima Goãmũ Abrahãre wererare iirãpũ. Erã Jesucristore umupeorã ãhrima. Sara áriro dopa ãhrima. Sarapũ pohro majago áribirimũriñumo. Mari Jesucristore umupeorã “Moise doreri mera taribea,” arãa. Jesucristo marire taucũ Goãmũ porã árirã mama Jerusalẽn maca majarã ãhraa. ²⁷ Eropirã Jesucristore umupeorã Goãmũ porãpũ bajarã árirãcoma. Moise dorerire iirãpũ bajamerã árirãcoma. Eropa ta arĩ werea Goãmũ yare gojarapũgue:

Mũhũ ne porã opabigo, porãcũri pũririñe pepibigo õaro mucubirique. Gajigo igo marapũ mera áriro igo porã áriquerẽcũ igo pãamerã árituriarã bajamerã árirãcoma. Mũpũre dohparagã mũ porã mariquerẽcũ mũ pãamerã árituriarã tauro bajarã árirãcoma. Eropigo mucubirique, arĩñumi Goãmũ.

²⁸ Isaa Abrahã magũ áriro dopa mari Goãmũ porã ãhraa. Isaa Abrahã magũ dehyoagũ Goãmũ ãgũ werediro dopa ta dehyoañumi. Mari

Goãmꝯ porã árĩrã Goãmꝯ ïgꝯ werediro dopa ta ïgꝯ porã ãhraa. ²⁹ Eropirã Abrahã porã perã árĩñuma. Pohro majago magꝯ Ismael árĩpehlerã masa iro dopa dehyoañumi. Isaapꝯ ïgꝯ pago igo porã bocamasibiricũ Espíritu Santo itamuri mera porãcũño. Erã dehyoara pꝯhrꝯ Ismaepꝯ pohro majago magꝯpꝯ Isaare Abrahã marapo magꝯre ïgꝯ ñero taricũ iimuriñumi. ïgꝯ iidiro dopa dohpaguere eropa wahaa. Erã Moise dorerire iidorerãpꝯ marire ñero taricũ iima. Mari Espíritu Santo itamuri mera Goãmꝯ porã ãhraa. Mari eropa árĩrãre marire ñero taricũ iima. ³⁰ Eropa wacũ Goãmꝯ yare gojarapũgue irire dohpa arĩrire buherãca. Õpa Goãmꝯ arĩñumi Abrahãre. “Mꝯ pohro majago magꝯ mꝯ oparire ne opasome, arĩñumi. Mꝯ marapo magꝯ dihta opapehogꝯcumi. Eropigꝯ mꝯ pohro majago igo magꝯ mera cóãque mꝯ pohrore,” arĩ wereñumi Goãmꝯ Abrahãre. ³¹ Eropirã, yꝯ acawererã, mari Goãmꝯ porã árĩrã pohro majago magꝯ iro dopa árĩbeaa. ïgꝯ pagꝯ oburire opamasibiriñumi. Maripꝯ mari Pagꝯ Goãmꝯ ïgꝯ oburire opamasirãca. Marire ïgꝯ mera õacũ iimi.

5

Cristo marire ïgꝯ taura pꝯhrꝯ turarã árĩro gahmea marire, arĩ gojapꝯ Pablo

¹ Eropigꝯ marire mari ñecu sũmarã árĩricuri dorero doca árĩnirãre Jesucristo tautuhajami. Mari ñero iira dipuwajare Jesucristo ïgꝯ basi wajayebasami mari Goãmꝯ mera õaro árĩboro

dopa. Eropirã mari Goãmũ porã árĩrã Jesucristore guñaturaniguicãro gahmea. Eropirã pee-biricãro gahmea erã Moise dorerire iidorerãre.

² Ōaro peeque yũre. Yũhũ Jesucristo ãgu apidiguã ãhraa. Eropiguã mũare õpa werea. Mũa Goãmũ mera õaro árĩmorã mũa gasiro merogã wiri aĩcũ Jesucristo mũare ãgu sĩribasara waja mariboya. ³ Eropiguã guhyadiaro mera werea daja. Goãmũ mera õaro árĩborore erã gasiro merogã wiri aĩrã Moise dorerire árĩpehrerire iiro gahmea erãre. ⁴ Eropirã mũa “Goãmũ marire taugũcumi Moise dorerire iicũ,” mũa arĩdiarã, mũa Jesucristore cóãrã iiboca. Mũa eropiirã Goãmũ ãgu mera õaro árĩburire mũare õaro ãgu iiburire cóãrã iiboca. ⁵ “Maripũ Goãmũ mera õhaa,” arĩmasia Jesucristore umupeori mera, Espĩritu Santo ãgu itamuri mera. “Goãmũ guare ‘Ñero iira dipuwaja mariro õarã ãhrima,’ arĩ ãagũcumi,” arĩmasia. ⁶ Eropiro gasiro merogã wiri aĩnirã árĩcũ sãre, wiri aĩbirinirã árĩcũ sãre ãabeami. Mari Jesucristore umupeorã árĩcũ gajirãre mari mahi umupeocũ ãhami Goãmũ.

⁷ Mũa ne Jesucristore umupeorã ãgu yare õaro diaye iimũribũ. Eropirã dohpaguere mũa Jesucristo yare diaye majare õaro iibiricũ gajirã mũare cãhmotañorã. ⁸ Goãmũpũ eropa iibirimi. ãgu mũare Jesucristo yarã árĩmorãre beyegũ ãhrimi. ⁹ Eropiguã õpa werea mũare. Yujungũ masũ ãgu guyarire buhenũgacũ peerã masa árĩpehrerã ãgũre peerã guyarire umupeorã wahama õaripũre peediabirã. ¹⁰ ãgu mũare

eropa gɥayarire buhenɥagaquerecũ õpa arĩ pepia. “Erã Jesucristore umupeorire oparã erã iri gɥaya buherire umupeosome,” arĩ pepia yũhũ mɥare. Mɥare goroweocoregure noho árĩgure ĩgũ eropa iira dipuwajare Goãmũ dipuwaja moagɥcumĩ ĩgũre.

¹¹ Õpa arĩ werewuãñorã gajirã yɥpũre: “ ‘Mari Goãmũ mera õaro árĩmorã mari gasiro merogã wiri aĩro gahmea,’ arĩ buhemi Pablo,” arãñorã yũre. Yũhũ eropa arĩ ne buhebeaa. Yũhũ dohpaguere “Gasirogã wiri aĩro gahmea,” yũ arĩ buhecũ irire iidorerãpũ yũre ñero taricũ iibiriboãnuma. Yũ õpa arĩ buhea: “Mari ñero iira dipuwajare Jesucristo wajayebasadi árĩmi crusague sĩrigũ. Eropirã mari Goãmũ mera õaro árĩmorã Jesucristore umupeoro gahmea,” arĩ buhea yũhũ. Yũ eropa arĩ buhecũ judio masa pee guama. Yũre ñero taricũ iima. ¹² Erãpũ mɥare goroweorãpũ gasiro merogã wiri aĩdorerãpũ erã basi wiri aĩpehocãporo.

¹³ Mɥapũre Goãmũ mɥa ĩgũ porã árĩmorãre aĩgũ mɥa Moise dorerire iimorãre beyebiripũ. Mɥare iri dorerire iidorebiriquerecũ mɥa mɥa ɥaribejarire iibiricãro gahmea. Õpa iiro gahmea. Mɥa árĩpehrerãre õaro mahi umupeorã erãre itamuniguicãro gahmea. Mɥa gajirãre umupeorã Moise dorerire árĩpehrerire iirãca. ¹⁴ Eropa ta arĩ gojara ãhraa: “Mũ basi mahiro dopa ta mũ pohro árĩrãre mahique,” arĩ gojara ãhraa. ¹⁵ Eropirã mɥa game ĩhaturicũ, papũri, mɥa disitĩri wereniguicũ mɥa basi õaro mɥa game umupeoro pehreboca. Eropirã mɥa basi

õaro árĩro gahmea.

Masa erã gamerire iirire Espíritu Santo ĩgu gameri sãre werepũ Pablo

¹⁶⁻¹⁷ Õpa arĩ werediaca mũare. Mari Jesucristo yarã árĩcũ mari pepirigue õpa ãhraa. Mari ñeri ùaribejari ãhraa. Espíritu Santo ĩgu gameri sã ãhraa. Mari ùaribejari Espíritu Santo ĩgu gameri mera yujuro mera árĩbeaa. Eropiro marire masiya mariro wahaa. Eropirã mũa Espíritu Santopũre yũhrirã mũa ùaribejaripũre iisome. Eropirã Espíritu Santo ĩgu gamerire iiniguicãque. ¹⁸ Eropirã Espíritu Santo gamerire iirã árĩrã “Moise doreri mera mari tarirãca,” arĩ pepibeaa mũa.

¹⁹ Masa erã ñeri ùaribejarire erã iicũ õaro ĩhamasica mari. Õpa iima erã ùaribejarire iirã: Ûma gajirã nome mera ñero iima. Nome sã gajirã ùma mera ñero iima. Diayea iiro dopa iiricũma. Ñerire pepima. Ñerire wereniguima. ²⁰ Eropirã goãmarã wéanirãre umupeorã “Mari goãmũ ãhrimi,” arĩ umupeoma. Gajirãre dojama. Eropirã masare doho ãhrima. ĩhaturima. Disitĩri wereniguima. Gajirãre doéma. Mata guama. Gajirãre tarinũgadiama. Yujuro mera árĩdiabeama. Yuju curu majarã gaji curu majarãre ĩhaturima. ²¹ Eropirã gajirãre gajinore erã opacũ ĩhaturima. Gajirãre wejẽdiarã wejẽma. Merericũrã ãhrima. Mererã ñerire ùaribejama. Eropa iirã gajino ñeri sãre iima. Eropigũ yũhũ mũare werediro dopa ta werea daja guhyadiaro mera. Iri ñerire iiniguigũ Goãmũ ĩgu opũ árĩroguere ejamasisome.

²² Espíritu Santo yapu òpa àhraa. Erāre òpa iirā árĩcũ iimi. Árĩpehrerāre mahi umupeoma. Mucubirima. Gũiro mariro àhrima. Gajirā erāre ñero iiquerecũ erā mera guabeama. Mojomoro ìhama. Duhuro mariro Goāmũ ìgu gamerire òaro iima. Erā mohmediarire erā mohmediabiriri sāre òaro iima. ²³ Eropirā nijiyajaro mera iima. Erā ñero iidiaquererā iibeama. Eropa ta iima Espíritu Santore yũhrirā. Eropa iirāre “Eropa iibiricāque,” ne arĩbeamĩ gajĩgu. ²⁴ Eropirā mari Jesucristo yarā árĩrā mari ñero árĩdirore duhucā mari gamerire mari uaribejarire iiniguicābeaa. ²⁵ Eropirā mari Espíritu Santo itamuri mera iirā árĩrā ìgure yũhriniguicāro gahmea.

²⁶ Eropirā mari “Yũhũ gajirāre tarinũgaa,” arĩ pepibiricārā. Eropirā gajirāre game ìhaturicũ iibiricārā. Gajirā erā òari oparire obobiricārā.

6

Mũa mera majarāre itamuque, arĩ werepũ Pablo

¹ Acawererā, mũa mera majagu Jesu yagu ìgu ñerire iicũ ìha ìgure itamuro gahmea mũa Espíritu Santo dorerire iirāpũre. ìgu iri ñerire duhucũ òaro mera werero gahmea. Eropa itamurā mũa òaro pee masique mũa sã ñerire iiri arĩrā. ² Eropirā mũa basi game itamuque árĩpehrero. Mũa eropa itamurā Jesucristo dorediro dopa ta iirāca.

³ Yujugu “Yũpũ òarire iigu àhraa,” arĩ pepigu, ìgu òarire iibiriqeregu òpa arĩgu ìgu basi

guyagu iimi. ⁴ Eropirã marire õpa iiro gahmea. Mari basi mari iiricũre õaro queoñanũrsiario gahmea. Eropa ãara pũru mari árĩricũri õari árĩcũ ãha “Yũhu õarire iiaa,” arĩmasia. Eropirã mari õari árĩricũri mera mucubirimasia gajirã árĩricũre ãaro mariro. ⁵ Eropigũ mari árĩricũre Goãmu beyegũcumi. Eropirã mari gajirã erã iiricũre ãhanũrbiricãro gahmea. Eropirã mari yujurãyeri iiripũre ãaro gahmea.

⁶ Eropirã Jesucristo yare õari buherire peerãpu erãre buherãpũre erã gamerire itamuporo árĩpehrerire õarire.

⁷ Eropirã “Goãmu yũ ñerire iira dipuwaja dipuwaja moasome yũre,” arĩ pepi masiya mara. Õpa arĩ pepirã muã diaye arĩ pepibirica. Eropiro Goãmũre gũya masiya mara. Eropirã mari dohpaguere iira waja pũrũgue bocarãca. ⁸ Eropirã mari uaribejarire iiniguirã iri ñeri iira waja dipuwajacũrãca. Eropirã peamegue warãca. Mari Espĩritu Santo gameripũre iirã õaro wajatarãca. Eropirã Goãmũ mera umũri nũcu õaro árĩniguirãca. ⁹ Eropirã mari Espĩritu Santo gamerire iiniguicãrã. Gariborebiricãrã. Goãmũ gamerinũ mari wajatarãca õarire duhubirã. Eropirã õarire iiniguicãro gahmea. ¹⁰ Eropirã árĩpehrerisubure õaro umupeoro gahmea árĩpehrerãre. Eropirã Jesucristore umupeorãre burigã mahi umupeoro gahmea yujugũ porã iro dopa.

Pablo ãgu weretura

¹¹ ãata. Yũ basi muãre gojagu pagari deyori mera gojagu iiaa. ¹² Eropigũ õpa werea muãre.

Erã mware gasiro merogã wiri aĩdorerãpũ òpa gahmema. Erã dorerire mwa iicũ ìha gajirã judio masa erã mera òaro árìbocoma. Eropirã erãre ñero taricũ iibiribocoma daja erã Jesucristo yare umupeoquerecũ. ¹³ Erã basi gasiro merogã wiri aĩquererã Moise dorerire gajire iibeama. Erã eropa iibiriquerã, mwapure erã dorerire iidorerã mwa gasiro merogã wiri aĩcũ gahmema erã. Eropa gahmema gajirã judio masare òpa erã arìboro dopa mucubiriri mera. “Gwa dorero mera Galacia majarã judio masa árìbirã mari árìricũre iiama,” erã arìboro dopa mware erã dorerire iicũ gahmema. ¹⁴ Yũ tamera erã eropa mucubiridiaro dopa ta ne mucubirissime. Mari Opũ Jesucristo iira mera dihta mucubiria. Ìgũ mari ñero iira dipuwajare wajayebasadigũ árìmi crusague s̄rigũ. Iri dihtare mucubiria. Jesucristo eropa iira mera yũhũ ìgũ taudigũ árìgũ masa erã waribejarire guñabeaa pare. I umũ maja masa erã waribejari sã doremāsibeaa yure. ¹⁵ Eropiro gasiro merogã wiri aĩcũ, wiri aĩbiricũ sãre Goãmũ ìabeami. Masa Jesucristo mera òari mera gohrotorã árìcũ ìhami. ¹⁶ Erã eropa gohrotonirã árìpehrerã iri buherire Jesucristo yare yũhrirãre “Erã òaro árìporo,” arĩ serẽa Goãmũre. “Erãre mũ ya curu majarã gohra árìrãre mojomoro ìaque,” arĩ serẽbasaa yũhũ Goãmũre.

¹⁷ Yũhũ Jesucristo dorediro dopa ta iigũ ìgũ yare buhera dipuwaja gajirã yure ñero taricũ iima. Erã eropa iira cami mura àhraa yure yũ dupure. Eropigũ òpa gahmea: Iripẽta yure bujawerecũ iiporo Jesucristo yarãre goroweorã.

18 Mũare árĩpehrerãre õaro árĩcũ gahmea.
Mari Opũ Jesucristo mũare árĩpehrerãre õaro
iiporo. Eropã ta iiporo. Iripẽta ãhraa.

Goãmu Yare Wereripu
Desano: Goãmu Yare Wereripu New Testament
copyright © 2011 Wycliffe Bible Translators, Inc.

Language: Desano

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 21 Feb 2024 from source
files dated 29 Jan 2022
17771afc-c309-57fd-9ff3-2d5a0cd59ff1